

Epeso

Jesus hã h'yy ka'eeh do Epeso häd näng do panang bä habong do hã Paw-Ro ma erih do hahỹh

Kedëng do ky n'aa hahỹh

¹ Paw-Ro ỹ ti hỹh, P'op Hagä Do karën do hyb n'aa Kristo Jesus mejũũ do see ỹ hado däk doo. Ỹ edëng bëeh, Epeso panang bä habong do tsyt hë P'op Hagä Do wë kasëew hõm doo, Kristo Jesus hã h'yy kata däk doo, ta hã h'yy kanerét doo.

² ãã karën P'op Hagä Do ër Yb, Jesus Kristo Tak'ëp Hyb N'aa Jawyk Do na-ããj hë ky en'yym bë hã. ãã karën baad bë rah'yib en'yym.

Kristo hyb n'aa ji P'op Hagä Do ky n'aa edëng do ky n'aa hahỹh

³ Taw'ããts hë ji j'aa etsë P'op Hagä Doo, ër Wahë N'aa Jesus Kristo h'yy kaha'eeh doo, ta Yb. Ti né ta ti tabag'ããs doo bä ër taky n'aa edëng do sahõnh hë baad hadoo doo me, hỹ pong jé hana doo me, badäk hahỹh bä naa nadoo doo me. Ër taky n'aa edëng, Kristo hã ër h'yy kata däk tabanoo do hyb n'aa. ⁴ Hahỹh da tabad'oo ër hã: Sahõnh hë badäk hahỹ tapahuunh do pooj jé, Kristo hyb n'aa ër tabasëew hõm ta wë. Ër tabasëew hõm tsyt hë, nesaa do mahãnh, baad had'op doo da ër babok hyb n'aa ta matym gó. Ër takamahãnh do hyb n'aa, ⁵ sahõnh hë tapahuunh do pooj jé, Jesus Kristo hyb

n'aa er hã tah'yyb däng, ta taah er bahadoo hyb n'aa kä. Tii d' tawén d'oo, tii da tah'yyb däng do hyb n'aa, tii da takarën do hyb n'aa. ⁶Ta wë er tabasëew hõm, ta taah er bahado däk tabanoo na-ãj hë, tak'ëp taky ennyym do hyb n'aa ji j'aa etsë hyb n'aa ta hã. Baad er wë taky ennyw hõm ta T'aah hyb n'aa, takamahän doo. ⁷Ta T'aah hyb n'aa, ta T'aah majyyw me er tabed'ëep nesaa do mahänh. Ta T'aah er hyb n'aa tadajëp do hyb n'aa, tabawug hõm nesaa do er h'yyb tym gó hanäng doo. Tii d' tawén d'oo, tak'ëp taky ennyym do hyb n'aa. ⁸Tak'ëp né hë er wë taky ennyw hõm. Sahõnh hã er tah'yy gan'yyh, sahõnh hã er h'yy kadaw'uuh tan'oo bã. ⁹P'op Hagä Do karën do hyb n'aa tametä wät er hã nyy da tah'yyb däng tabad'oo Kristo hyb n'aa. Pooj jé, dooh hapäh pé tah'yyb däng doo. ¹⁰Hahÿ ti P'op Hagä Do h'yyb däng tabad'oo: Tah'yyb däng do noo gó kajaa bã kä, sahõnh hë, hÿ pong jé habong doo, badäk hahÿ hã habong do na-ãj hë, séd hã da tabata däk, sahõnh hë sa nu gabóg Kristo bahado däk hyb n'aa kä.

¹¹Kristo hyb n'aa, ãã P'op Hagä Do asëew hõm ta karapee ãã bahadoo hyb n'aa. Tii d' tawén d'oo, p'ooj ub tah'yyb däng do hyb n'aa tii da ãã hã tabad'oo. Takarën doo da né hë P'op Hagä Do moo wät sahõnh hë. ¹²Ãã tabasëew hõm ta wë, P'op Hagä Do kabaj'aa do ãã j'aa etsë hyb n'aa, ãã pooj jé Kristo hã h'yy kae däk doo. ¹³Kristo hyb n'aa, bë hã na-ãj hë taban'oo däg kån ta karapee bë bahadoo hyb n'aa hÿ kë. Baad hadoo do ky n'aa, ji tabed'ëep do panyyg n'aa hanäm do bë maa napäh bã, Kristo hã bë h'yy kae däk bã kä, bë hã taban'oo

däg kãn ta Sahee taky n'aa enooh do paah. ¹⁴ Ta jawén, ta karapee P'op Hagä Do baad tabed'ëep noo gó kajaa bä kä, ër gadoo da sahõnh hẽ ër hã taky n'aa enooh doo. Pooj jé dó ër hã tabanoo ta Sahee, ta jawén ër gadoo do metëe n'aa. Sahõnh hẽ ta ti tawén d'oo, ta kabaj'aa do ji j'aa etsë hyb n'aa.

Jesus hã h'yy ka'eeh do sa hyb n'aa Paw-Ro ky n'aa etsëe do ky n'aa hahÿÿh

¹⁵ Ti hyb n'aa, ÿ ky n'aa napäh bä Jesus, Tak'ëp Hyb N'aa Jawyk Do hã bë h'yy kae däk doo, sahõnh hẽ ta hã h'yy ka'eeh do bë kamahãn ÿ ky n'aa napäh bä na-ããj hẽ, ¹⁶ ÿ paa du doo P'op Hagä Do hã ÿ j'aa etsë bë hyb n'aa. Dooch ÿ eréd bä bë hyb n'aa P'op Hagä Do ÿ j'aa etsë doo. P'op Hagä Do hã ÿ ky n'aa etsëe bä, bë ÿ ky n'aa ets'ëe had'yyt hẽ. ¹⁷ P'op Hagä Do ër Wahë N'aa Jesus Kristo h'yy kaha'eeh doo, ër Yb tak'ëp kabaj'aa doo, tak'ëp baad hadoo do hã ÿ ky n'aa etsëe, ta Sahee me bë tah'yy gan'yyh hyb n'aa, bë hã tagahoot hyb n'aa na-ããj hẽ, baad P'op Hagä Do bë bahapäh hyb n'aa kä. ¹⁸ Bë hyb n'aa ÿ ky n'aa etsëe, bë h'yy kadaw'uuh P'op Hagä Do an'oo bä, bë hapäh hyb n'aa ny hadoo do baad hadoo do ta jawén bë gadoo do pan'aa bë P'op Hagä Do wén naëej wät.* Æã karën bë bahapäh tak'ëp hajõng doo, tak'ëp hetsooh do ta karapee tsyt hẽ ta wë kasëew bong do sa hã taky n'aa enooh doo, ta jawén ragadoo hyb n'aa. ¹⁹ Æã ky n'aa etsëe na-ããj hẽ bë bahapäh

* **1:18** Badagyp do hadoo doo gó ji bawät nä noo gó, ji P'op Hagä Do naëenh Jesus hã ji h'yy ka'eeh hyb n'aa, edëb had'yyt do takarën tabanoo do hyb n'aa ji hã. Hajõng baad hadoo do na-ããj hẽ takarën tabanoo ji hã.

hyb n'aa, tak'ëp sahõnh hẽ bahãnh hadoo do ta hejój ëër, ta hã h'yy ka'eeh do hã tanoo doo. Ti né hẽ ta ti ta hejój tak'ëp ta kabaj'aa doo me tametëeh doo, ²⁰ dejëp do mahang Kristo ganä wät tan'oo bä. Ta ti hejój me né hẽ, hỹ pong jé, ta hub hadäk hẽnh, takaweh'ëeh doo bä, Kristo basooh P'op Hagä Do an'oo bä, ²¹ sahõnh hẽ kabaj'aa do ji nahapäh do sa bahãnh, sahõnh hẽ bag'ääs do ji nahapäh do sa bahãnh, sahõnh hẽ hejój enäh do ji nahapäh do sa bahãnh, sahõnh hẽ mejũũ do ji nahapäh do sa bahãnh Kristo bahado däk hyb n'aa kä. Sahõnh hẽ hyb n'aa jewyk doo, da hẽ habong doo, ta jawén habong do na-ãäj hẽ, sa bahãnh hyb n'aa jawyk Kristo bahadoo P'op Hagä Do an'oo bä na-ãäj hẽ. ²² Sahõnh hã Kristo mejũũ P'op Hagä Do an'oo bä, sa hã taj'aa ketsëë däk do hyb n'aa. Sahõnh hẽ ta hã h'yy ka'eeh do sa nu gabóg Kristo, P'op Hagä Do an'oo bä. ²³ Kristo hã h'yy ka'eeh doo, Kristo hub hadoo, ta tsyym hadoo, ta moo hadoo. Sa hyb n'aa baad sahõnh hẽ takaja däk Kristo wë, ta hã rakata däk hyb n'aa. Kristo né hẽ ti sahõnh hẽ baad takaja däk hanoo doo.

2

¹ Bëeh, dejëp do hadoo bë h'yyb tym p'ooj ub P'op Hagä Do hã, tamejũũ do bë ky nadaheeh do hyb n'aa, baad nadoo do bë moo bok do hyb n'aa na-ãäj hẽ. ² Nesaa do bë moo heb'ooh paah, badäk hahỹỹ hã habong do P'op Hagä Do hã h'yy kana'eeh do rabahed'oo doo da né hẽ. Ti noo gó bë paa ky daheeh Nesaa Do Yb, karap'aar h'yyb nesaa do wë hã habong do sa wahë n'aa, P'op Hagä Do hã ky nadah'eeh do sa h'yyb mejũũ doo. ³ ãã na-ãäj hẽ,

ãã sahõnh hẽ, ky nadah'eeh do sa da h'yyb hadoo paa ããh, Jesus hã ãã h'yy kana'eeh nã bã. Nesaa do ãã hub karẽn do jawén, ãã h'yyb sãg karẽn do jawén na-ããj hẽ ãã babok paah. Nesaa hyb n'aa ji h'yyb ji henãng noo gó naa, ãã na-ããj hẽ P'op Hagã Do rejãã paawã, sahõnh hẽ ta wób sa nemuun.

⁴Ti hado né paawã, P'op Hagã Do tak'ëp ji tat'yyd mehĩn doo, tak'ëp ër takamahãn do hyb n'aa ⁵ër tabedëeb wät hadoo Kristo sii ër dejëp do hadoo noo gó. Dajëp hadoo paa ëër, P'op Hagã Do mejũũ do ër ky nadaheeh do hyb n'aa. (Jããm hẽ bẽ hã taky enyym do hyb n'aa bẽ tawén edëeb wät nesaa do mahãnh. Dooh bẽ hanaa tado bã tii.) ⁶Kristo sii ër ganã wät hadoo tan'oo bã, Kristo Jesus sii hỹ pong jé ër bat'oonh hadoo tan'oo bã na-ããj hẽ,* Kristo hã ër h'yy kata däk do hyb n'aa. ⁷Tii d' tawén d'oo, tak'ëp, sahõnh hẽ bahãnh hadoo do taky enyym do hỹ jawén sahõnh hã takametëeh hyb n'aa. Ër hã Kristo Jesus bad'oo do hã kametã däk tak'ëp ji wẽ taky enyym doo. ⁸Jããm hẽ bẽ hã taky enyym do hyb n'aa bẽ tedëeb wät nesaa do mahãnh, bẽ h'yy ka'eeh do hyb n'aa ta hã. Dooh bẽ hanaa tado bã tii. P'op Hagã Do anoo tii, ji matym n'aa hadoo. ⁹Dooh baad hadoo do ji moo wät do hyb n'aa ji tawén ed'ëep, ji daaj hẽ ji hã hẽ ji h'yy kasabé mahãnh. ¹⁰P'op Hagã Do mo haj'aa ëër. Papuuj ër tapehuunh Kristo Jesus hyb n'aa, baad hadoo do ër moo bok hyb n'aa hỹỹ kã. P'op Hagã Do enyww däk paa ër pooj jé ta ti baad hadoo do ër moo bok do pan'aa.

* **2:6** Ta sii ër bag'ããs hyb n'aa, ta sii hỹ pong jé ër bat'oonh tan'oo bã.

Séd rah'yyb hedo däg kän sahõnh hẽ Kristo hã h'yy ka'eeh do ky n'aa hahỹỹh

¹¹ Ti hyb n'aa, bëeh, Judah buuj nadoo doo, “Masuuj noo byyh kanehõk do” bë ramaneëenh do Judah buuj hã, sa daaj hẽ “Masuuj noo byyh kehõk do” rakamaneëenh do hã, bë hyb n'aa newë nyy da pooj jé bë babok do paah. (Ta ti Judah buuj bad'oo doo, sa daaj hẽ sa hã hẽ ramoo bok do tii.) ¹² Ti noo gó, dooh Kristo bë hapëë bã. Dooh Isaraéw buuj, P'op Hagä Do karapee uuh bë do bã. Dooh bë gado bã ti noo gó Isaraéw buuj sa hã P'op Hagä Do ky n'aa enooh doo, sa uuh bë nadoo do hyb n'aa. Badäk hahỹỹ bã bë baboo né paawä, dooh baad hadoo do bë gada pé ti noo gó, daap bë babok, dooh P'op Hagä Do bë hapëë bã ti noo gó. ¹³ Hỹỹ kä, Kristo Jesus hã bë h'yy kata däk do hyb n'aa, bëeh, pooj jé dawëë P'op Hagä Do mahãnh habong doo, p'eets hẽ, ta wë bë tamana kän, Kristo ji hyb n'aa tadajëp do hyb n'aa.

¹⁴ Kristo né ti hanoo, Judah buuj, Judah buuj nadoo do rakamanajë bong hyb n'aa. Séd uuh hẽ ër bahado däk tan'oo bã kä. Pooj jé ti anäng ta baa besuu n'aa hadoo, sa h'yyb gó Judah buuj dooh ragado bã Judah buuj nadoo do hanoo doo. Dooh séd rah'yyb hedo bã pooj jé, rakamaj'ĩ paah. Hỹỹ kä Jesus ado hõm ta baa besuu n'aa hadoo doo. ¹⁵ Hahỹỹ d' tabad'oo tii: Ji hyb n'aa tadajëp do hyb n'aa, dooh Mosees ky n'aa jaw'yyk doo, hajõng hedoo do hã ji tamejũũ do hyb n'aa tado wäd bã P'op Hagä Do ji tagadoo, Kristo an'oo bã. Tii d' tawén d'oo papuuj hadoo do takarën. Takarën sét rabahado padëek Judah buuj Judah buuj nadoo doo, ta hã rah'yy kata däk do hyb n'aa. Tii d'

tabad'oo do hyb n'aa, tado hõm rakamajĩ doo. ¹⁶ B'aa kajatsëk do hã tadajëp do hyb n'aa, tado hõm kãn rakamajĩ doo. P'op Hagä Do najiis raba-hado padëek tan'oo bã, b'aa kajatsëk do hã tadajëp do hyb n'aa. Dooch ta majĩ rahado boo bã tan'oo bã, ta hã h'yy ka'eeh doo. ¹⁷ Kristo ewäd hyng, ta ky n'aa hanäm do ji tamaher'oot hyb n'aa. Ta ky n'aa hanäm do an'oo bã h'yyb nyyw gó ji bawät P'op Hagä Do wë, ta wób sa wë na-ããj hë. Bë hã, dawëë P'op Hagä Do mahãnh habong do paa hã, ãã Judah buuj hã, P'op Hagä Do ky n'aa napäh do hã na-ããj hë tamaher'ood wät ta ti ky n'aa. ¹⁸ Hỹỹ kã Kristo hyb n'aa, sahõnh hë ëër, Judah buuj, Judah buuj nadoo do na-ããj hë, ër hajaa ër ana bã ër Yb hỹ pong jé hawät do matym gó,† sét ub ta Sahee hyb n'aa, ër gadoo doo.

¹⁹ Ti hyb n'aa kã, bëeh, Judah buuj nadoo doo, dooch ta wób buuj bë do wäd bã. P'op Hagä Do karapee uuh né hë bë hỹỹ kã. P'op Hagä Do taah né hë bëeh, ta wób sa nemuun. ²⁰ Tsäng s'ëëb, tób pan'aa ta hejój n'aa jó ji at'ëëg häng do hadoo bëeh. Jesus mejũũ doo, Jesus ky n'aa rod na-ããj hë, ta ti tób hejój n'aa hadoo. Pã yb, sahõnh hë tób mesoo doo, Kristo Jesus né hë tii. ²¹ Sahõnh hë ëër, ër h'yy kata däk Kristo hã. Kristo hyb n'aa, p'op gadat'ëë sëek do hadoo tób pan'aa hadoo do ëër, P'op Hagä Do tób n'aa hadoo ër bahadoo hyb n'aa, tsyt hë Tak'ëp Hyb N'aa Jawyk Do wë kasëew däk doo. ²² Kristo hã bë h'yy kata däk do hyb n'aa, bëeh, Judah buuj nadoo doo, bë na-ããj hë séd hã bë h'yy kata däk sahõnh hë Jesus hã h'yy ka'eeh do wób sa

† **2:18** Ji ky n'aa ets'ëë bã tii, ji ma ejãm bã, P'op Hagä Do ji j'aa etsëë bã na-ããj hë.

sii, P'op Hagä Do tób n'aa hadoo ër bahadoo hyb n'aa kä. Ta Sahee ër mahang tabawäd kän.‡

3

¹ Ti hyb n'aa kä, ÿÿh, Paw-Ro, Judah buuj nadoo do hä Kristo Jesus ky n'aa ÿ ma metëek do hyb n'aa ÿ radawäts geët doo, ÿ ky n'aa etsëë bë hyb n'aa.

P'op Hagä Do h'yyb däng do Paw-Ro hä takametä däk do ky n'aa hahÿÿh

² Hä ÿ P'op Hagä Do anoo, bëeh, Judah buuj nadoo do ÿ ma metëek hyb n'aa ji wë taky enyym do ky n'aa. Hä ÿÿ, bë ky n'aa napäh hä ÿ tan'oo däk doo. ³ Ta h'yyb däng doo, pooj jé ji nahapäh nä do P'op Hagä Do metä wät hä ÿÿ. Ganapog is doo me bë ÿ ma erii däk ta ti ky n'aa hä nag'aap hë. ⁴ Bë ner'ood bä, bë hyb n'aa matakä bä, bë hapäh da, baad ÿ bahapäh Kristo ky n'aa pooj jé ji nahapäh doo. ⁵ P'ooj ub, ji wahë maküü hä dooh P'op Hagä Do metä bä paa nyy da tah'yyb däng tabad'oo doo, da hë ta Sahee me Jesus mejüü do sa hä, ta ky n'aa rod sa hä na-ääj hë tametëeh do pénh. Tsynt hë ta wë tasëew hõm do sa hä tametä kän. ⁶ Hahÿ ti da hë tametëeh doo: Jesus ky n'aa hanäm do ragado bä, séd hä rah'yy kata däk Kristo Jesus hä. Ti hyb n'aa kä, Judah buuj nadoo do ragadoo da Judah buuj sii P'op Hagä Do sa hä taky n'aa edëng doo. Sét

‡ **2:22** Hahÿ tahanäng pé ti tég nad'ëed is do 20, 21, 22 hä kerii däk doo: Sét ken'yyh sahõnh hë ëër, ër ky daheeh Kristo ky n'aa Jesus mejüü doo, ta ky n'aa rod na-ääj hë ër hä rama met'ëeg wät doo. Kristo hyb n'aa né hë séd hä ër h'yy kata däk. P'op Hagä Do karapee, tsynt hë ta wë kasëew bong do ër bahado däk Kristo an'oo bä. Ta Sahee me P'op Hagä Do awät hÿÿ kä ër mahang.

hẽ Jesus hub hadoo rabahado padëek Judah buuj sa sii. Sét né hẽ P'op Hagä Do karapee rabahado padëek. Judah buuj sa sii ragadoo da hÿÿ kä P'op Hagä Do ky n'aa enooh doo.

⁷ P'op Hagä Do ky enyym do hyb n'aa wë ÿÿ, ta hejój hã ÿ tabanoo do hyb n'aa, hã ÿ taban'oo däk ta ti ky n'aa hanäm do panäg n'aa ÿ bahadoo hyb n'aa. ⁸ Sahõnh hẽ P'op Hagä Do karapee sa yd jé had'os do né paawä ÿÿh, P'op Hagä Do anoo hã ÿÿ, Judah buuj nadoo do sa hã ÿ maher'oot hyb n'aa Kristo tak'ëp ky enyym doo, tak'ëp kabaj'aa do ky n'aa. Dooh ji haja bä baad ji h'yy kadawuung bä Kristo wë hanäng do hã. Jããm hẽ ta uuh hã ji h'yy kadaw'uuh, tak'ëp ta bahãnh baad tabahadoo do hyb n'aa. ⁹ P'op Hagä Doo, sahõnh hẽ mo haj'aa näng doo, hã ÿ tabanoo ta wób ÿ maher'oot hyb n'aa nyy d' tabad'oo tah'yyb däng doo, p'ooj ub sahõnh hẽ badäk hahÿÿ bä habong do paa hã tamanetëeh doo, ta h'yyb gó tenäm doo. ¹⁰ Tii d' P'op Hagä Do wén d'oo, hÿÿ kä, Jesus hã h'yy ka'eeh do sa hyb n'aa kametä däk hyb n'aa wë hã habong do kabaj'aa do sa hã, wë hã bag'ããs do sa hã na-ããj hẽ, P'op Hagä Do h'yy ganäng sahõnh hẽ hã. ¹¹ P'ooj ub, sahõnh hẽ tadu dahäng do pooj jé P'op Hagä Do h'yyb gó tabanyy däk doo da né hẽ tabadoo kãn ta tii, Kristo Jesus, Ęr Wahë N'aa bad'oo do hã. ¹² Kristo hã Ęr h'yy kata däk do hyb n'aa, ta hã Ęr h'yy ka'eeh do hyb n'aa na-ããj hẽ, h'yyb neÿÿm doo me Ęr hajaa Ęr ana bä P'op Hagä Do matym gó Ęr ky n'aa ets'ëë bä, Ęr ma ejãm bä. Dooh ge'ÿÿm pé ji. ¹³ Ti hyb n'aa ÿ etsëë bë hã, bë h'yy gejë hõm manäh, nesaa do ÿ radawäts gëët doo bä bë hyb

n'aa ŷ ahoop do hyb n'aa, baad tabahadoo hyb n'aa bē hã ta ti ŷ ahoop doo. Taw'ãäts hē bē tsebee ta ti hyb n'aa.

¹⁴ Ti hyb n'aa kã, taron ŷ nu paa me ŷ bahyy hãng ər Yb hŷ pong jé hawät do wē, bē hyb n'aa ŷ ky n'aa etsēē hyb n'aa. ¹⁵ Ta ti ər Yb an'oo bã hŷ pong jé habong doo, sahõnh hē badäk hahŷ hã habong do na-ãäj hē rababok hyb n'aa. ¹⁶ Tak'öp ər Yb kabaj'aa, tak'öp baad ub. Ti hyb n'aa ŷ ky n'aa etsēē ta Sahee me bē tah'yb hej'oonh hyb n'aa.

¹⁷ ã ky n'aa etsēē na-ãäj hē bē h'yb gó Kristo bawäd had'yyt hē hyb n'aa, ta hã bē h'yy ka'eeh do hyb n'aa. ã ky n'aa etsēē bēeh, baad had'yyt hē bē kamahñ hyb n'aa, kamahñ gó sahõnh hē bē moo bok hyb n'aa, ¹⁸ sahõnh hē P'op Hagä Do karapee wób sa sii baad bē h'yy kadaw'uuh hyb n'aa tak'öp baad had'op ji Kristo kamahñ do hã. ¹⁹ ã karēn paawä bē bahapäh ta ti ji Kristo kamahñ doo, dooh né paawä ji haja bã sahõnh hē ji hapēē bã, ta bahñh baad ub tabahadoo do hyb n'aa. Ji hã takamahñ do bē bahapäh ŷ wén karēn, baad bē h'yb gó P'op Hagä Do bawät hyb n'aa, P'op Hagä Do bawät doo da né hē bē baboo däk hyb n'aa kã.

²⁰ Ta hã ər hajaa ər ky n'aa etsēē do bahñh, ər hajaa ər hyb n'aa newēē do bahñh tak'öp P'op Hagä Do hajaa tamoo wät ər mahang, ta hejój me ər h'yb gó hawät doo me. ²¹ ã karēn Jesus hã h'yy ka'eeh do sa hyb n'aa, Kristo Jesus hyb n'aa na-ãäj hē P'op Hagä Do kawehēē däg had'yyt hē. ŷŷ. Tii d' né hē. Taw'ãäts hē.

P'op Hagä Do karēn doo da ji bawät do ky n'aa hahÿÿh

¹ Ti hyb n'aa, ÿÿh, Tak'ëp Hyb N'aa Jawyk Do ky n'aa ÿ ma metëek do hyb n'aa ÿ radawäts gëet doo, tak'ëp ÿ betsëē bē hā P'op Hagä Do ta wē tats'yyt do sa hā takarēn doo da né hē bē babok. ² Taw'ääts hē dooh né hē bē h'yy kasabé bā. Taw'ääts hē kaja hē denaa hē bē h'yyb bē mahũũm ta wób sa wē. Nayyw hē bē kawaj'ään manäh. Taw'ääts hē kamahän gó bē gadoo, ta wób bē ganen'aak do ramoo boo né paawä bē hā. ³ Séd er h'yyb hedo däk P'op Hagä Do Sahee an'oo bā. Ti hyb n'aa taw'ääts hē bē hyb n'aa tam'aah, h'yyb nyyw gó had'yyt hē bē babok ta wób sa wē, tanahanh hyb n'aa séd bē h'yyb hedoo doo. ⁴ Sét né hē Jesus hub hadoo ëer, ta hā h'yy ka'eeh doo. Sét né hē P'op Hagä Do Sahee er gadoo doo. Ti hadoo na-ään hē, sét né hē baad hadoo do bē gada do ta jawén bē gadoo do pan'aa, bē P'op Hagä Do wén naëej wät. ⁵ Sét né hē er Wahë N'aa, Jesus, Tak'ëp Hyb N'aa Jawyk Doo. Sét né er h'yy ka'eeh doo. Sét né hē er nu gahem'uun doo. ⁶ Sét né hē P'op Hagä Doo, sahõnh hē ta hā h'yy ka'eeh do sa Yb, sahõnh hē tabag'ääs doo, sahõnh hā moo wät doo, sahõnh hē er h'yyb gó hawät doo.

⁷ Tii d' tahado né paawä, sét nado er hā tanoo do er hajaa doo. Kristo h'yyb däng doo da, sahõnh hē sa hā tabanoo ji hajaa do P'op Hagä Do Sahee anoo doo. ⁸ Ti hyb n'aa né hē hahÿÿ da P'op Hagä Do kyy kerih do her'oot paah:

“P'op tabasëek noo gó,

duu hēnh rabana ta majĩ wób tameso padēek do
tan'oo bã.
Tii bã sa matym n'aa taban'oo däg kãn ta karapee
hã.”*

⁹ (Hahỹỹ d' tahanäng pé ti p'op tabasēek doo: Tabasēek do pooj jé badäk hahỹỹ bã Kristo bewäd hyng. ¹⁰ Ti né hē ti hỹ pong jé hasēek do sahōnh hē sa bahñh tabahado däk hyb n'aa, sahōnh hē tabag'ããs hyb n'aa kã.) ¹¹ Ti né hē ti ta wób hã tabanoo ta mejũũ do rabahadoo hyb n'aa. Ta wób hã tabanoo P'op Hagã Do Sahee sa hã metēeh do her'oot doo. Ta wób hã tabanoo ta panyyg hanãm do jé pad'yyt hē rabaher'ood hōm hyb n'aa. Ta wób hã tabanoo Jesus hã h'yy ka'eeh do sa hagã n'aa, sa ma matēg rabahadoo hyb n'aa. ¹² Ti hadoo pé tawén noo sa hã, P'op Hagã Do karapee ramasa hyb n'aa, takarēn do ta karapee rahajaa ramoo bok hyb n'aa. Tii d' tawén d'oo na-ããj hē, Kristo hã h'yy ka'eeh do rah'yy kahej'oonh hyb n'aa, baad rah'yy ka'eeh, baad raky dahé magyys hē hyb n'aa, ¹³ sahōnh hē ēer, séd hã er h'yyb hedo däg kãn hyb n'aa er h'yy kaha'eeh do hyb n'aa, P'op Hagã Do T'aah er hapäh do hyb n'aa. Aj'yy h'yyb mapēē däk do hadoo er bahado däk tii bã, Kristo hado däk né hē er bahadoo hyb n'aa kã. ¹⁴ Tii bã, dooh karepé er hado boo bã kã. Dooh h'oo t'aah hadoo er hado boo bã, jé pad'yyt hē maadaka maeh do mahũũm doo, jé pad'yyt hē bah'ood ahēm hōm doo. Dooh ajyy ji hã wad'ii doo, h'yy kamep'ēeh doo me panyyg hahup nadoo do rama mehet'ēek do er ky dahé wäd bã, ÿ hanäng péh. ¹⁵ Hỹỹ kã,

* **4:8** Saaw-Mo 68.18

taw'ãäts hē kamahän gó er ber'oot er maa newëë baad hadoo do ky n'aa, sahõnh hē ta tii hã er h'yyb mepëë däk hyb n'aa, Kristo hadoo er bahado däk hyb n'aa kã. Ta hã h'yy ka'eeh do sa nu gabóg né ti Kristo. ¹⁶ Ta hub hadoo ëer. Sahõnh hē ji hã hanäng doo, ji tsyym hedoo doo, ji moo hedoo doo, ji jarãã masoo baad tabahadoo hyb n'aa. Sahõnh hē ji hã hanäng do baad rado bã, baad ub tii bã ji, ji hejoonh. Ti hadoo er hã, Jesus hã h'yy ka'eeh do hã: Kamahän gó er sahõnh hē er moo boo bã Kristo, er nu gabóg, sét ken'yyh er hã tanoo doo, tii bã er da h'yy kahej'oonh, baad er h'yy kae magyys hē, baad er ky dahé magyys hē.

¹⁷ Ti hyb n'aa, Tak'ëp Hyb N'aa Jawyk Do kyy gó tak'ëp péj bë ÿ mejũũ, P'op Hagä Do sa h'yyb gó nahapäh do rababok doo da bë aboo boo manä wäd! Daap hadoo do rahyb n'aa newëë do jawén rababok tii. ¹⁸ H'yy gatamah baad hadoo do hã. Nabuj keh'ũũm do hyb n'aa, dooh rah'yy kadawu-ung bã, dooh rah'yy gah'ood bã P'op Hagä Do hã. Ti hyb n'aa dooh rahapëë bã na-ããj hē papuuj gó ji awät doo, ji hã P'op Hagä Do anoo doo.

¹⁹ Rawao däk nesaa do ramoo bok do hã. Ti hyb n'aa dooh ranu mebyy wäd bã nesaa do ramoo bok do hã. Sa h'yyb karën do jawén rababoo had'yyt hē. Hajõng hedoo pé nu meby n'aa näng do ramoo boo had'yyt hē. Dooh rah'yy keba bã ta ti hedoo do hã. Kah'ũũm ta ti nesaa do rakarën doo. ²⁰ Bëë kã, dooh ta ti rababok doo da bë aboo boo bã do hyb n'aa Kristo bë wén hapëë däk bë h'yyb gó. ²¹ Bë ky n'aa napäh né hē Kristo ky n'aa. Bë ãã ma met'ëëg wät nyy da takarën bë babok, ta hã bë h'yy kata däk do hyb n'aa. Baad hadoo do ky

n'aa Jesus hanaa bë ãã ma met'ëëg wät doo. ²² Bë ãã ma met'ëëg wät, bë beréd hõm hyb n'aa pooj jé bë babok do paah, ji h'yyb karën do ji tawadii do hyb n'aa baad nado wäd doo. ²³ Bë ãã ma met'ëëg wät, bë an'oo bë P'op Hagä Do h'yyb wareem. ²⁴ Bë ãã ma met'ëëg wät, bë gadoo hyb n'aa kä bë h'yyb tym papuuj, P'op Hagä Do mo haj'aa ta da hadoo tabahadoo hyb n'aa. Baad had'op ji bawät, P'op Hagä Do karën doo da ji bawät ta ti an'oo bä. Baad hadoo do hanaa ta tii da ji bawät doo.

²⁵ Ti hyb n'aa bë noo kanesa manäh. Taw'ãäts hë bë noo gehub bë da hadoo do sii bë er'ood bä, séd uuh ër sahõnh hë ër bahadoo do hyb n'aa. ²⁶ Bë kawaj'ãän bä, bë an'oo manä baad nadoo do bë moo boo ta ti hyb n'aa. Kawaj'ãän bë hyb n'aa hũüm manäh. Bë h'yyb ehód manä bë kawaj'ãän doo. ²⁷ Bë an'oo manä ta tyw n'aa Dijab† hã, bë tah'yyb natatuk hyb n'aa.

²⁸ Pooj jé hets'ëëk doo, taw'ãäts hë dooh tetsëëg wäd bä. Taw'ãäts hë tamoo wät hÿÿ kä, ta wë tabanäng hyb n'aa, wë bedoh do tamasa hyb n'aa kä.

²⁹ Bë esog manä nesaa do ta wób h'yyb rejãã doo. Jããm hë baad hadoo doo, ta wób masa do bë her'ood. Ji da hadoo do h'yy katón bä, ji h'yyb en'yyim ji her'oot doo me. Tatsebee bä, tsebé doo me ji ber'oot. Ti hõm do had'yyt hë. Tii d' bë bad'oo baad tanu däng hyb n'aa maa new'ëë do sa hã. ³⁰ Bë er'ood manäh, bë moo boo manä na-ãäj hë P'op Hagä Do Sahee h'yy katón hanoo

† **4:27** Gereg kyy me ramaneëënh Nesaa Do Yb, Dijab. “Ji taky n'aa tapa had'yyt doo”, tahananäng pé ti Dijab.

doo. Ta Sahee P'op Hagä Do anoo dó er hã, er ta karapee tametëeh hyb n'aa. Tanoo dó er hã baad er tabed'ëep bã kä. ³¹ Taw'ãäts hẽ bë eréd hõm sahõnh hẽ bë manabaan doo, h'yy ganapũũ doo, ji kawajãän doo, ky ked'aak doo, ta see ji ky n'aa rejãã do na-ããj hẽ. Taw'ãäts hẽ bë eréd hõm né hẽ bë da hadoo do bë pan'aa takyyk doo. ³² Taw'ãäts hẽ h'yyb nyyw gó bë gadoo ta wób. Taw'ãäts hẽ bë t'yyd mehĩn bë da hadoo doo. Taw'ãäts hẽ bë mabaan hõm baad nadoo do ta wób bë hã rabad'oo doo, nesaa do bë moo bok do paah Kristo hyb n'aa P'op Hagä Do mabaan hõm doo da né hẽ.

5

¹ Ti hyb n'aa, taw'ãäts hẽ P'op Hagä Do bad'oo doo da né hẽ bë bad'oo, ta taah tak'ëp takamahän do bë bahadoo do hyb n'aa. ² Taw'ãäts hẽ kamahän gó bë babok, Kristo er takamahän doo da né hẽ, ta daaj hẽ takan'oo däk doo, er hyb n'aa tadajëp hyb n'aa. P'op Hagä Do h'yy gadajang Jesus hã, ta daaj hẽ takan'oo däk do hyb n'aa er hyb n'aa tadajëp noo gó.

³ Bë aã manä bë yĩm nadoo do sii, bë patug nadoo do sii. Bë moo boo manä nesaa do nu meby n'aa näng do bë hã hanäng doo me. Bë hyb n'aa hũũm manä bë ma. Tabad'op hẽ ti hedoo do bë moo boo manäh. Dooh bë er'ood bë da hadoo do sii ta ti hedoo do ky n'aa. Dooh tii da P'op Hagä Do karapee tsyt hẽ ta wẽ tasëew hõm do raboo bã. ⁴ Bë er'ood manä nesaa do nu meby n'aa näng doo. Daap hadoo do na-ããj hẽ, taw'ãäts hẽ dooh bë her'ood. Taw'ãäts hẽ dooh bë ky masuuj bã nu meby n'aa näng doo me ta wób rakawew'aam

hyb n'aa. Dooh tii da rer'ood bä Jesus hä h'yy ka'eeh doo. Taw'ääts hē hahÿÿ da bē bad'oo: P'op Hagä Do wē ēr tsebē baad hadoo do ēr hä tanoo do hyb n'aa. ⁵ Baad ÿ karēn bē bahapäh hahÿÿh: Sa ÿÿm nadoo do sii, sa patug nadoo do sii he'ÿÿh doo, nesaa do nu meby n'aa näng do sa hä hanäng doo me ramoo bong doo, sa ma rahyb n'aa h'üüm do na-ääj hē, dooh ragado bä Kristo P'op Hagä Do daheeh rabag'ääs doo bä. Sa ma rahyb n'aa h'üüm doo, kabarii hä h'yy kaha'eeh do hadoo, sa ma hä rah'yyb padēek do hyb n'aa. Dooh P'op Hagä Do hä rah'yy kae heh'äät ta tii. ⁶ Bē gado manä ky kamep'ēeh doo me bē rakarēn bä bē rawad'ii bä, ji hajaa nanäng nesaa do ji moo wäd bä raheer'ood bä. Ta ti hedoo do hyb n'aa né hē P'op Hagä Do rejää da nabuj keh'üüm doo. ⁷ Ti hyb n'aa sa da bē h'yyb hedo manäh.

⁸ Badagyp do hadoo doo gó bē babok paah. Hÿÿ kä ta bag hadoo doo gó bē baboo däk Tak'ēp Hyb N'aa Jawyk Do hä bē h'yy kata däk do hyb n'aa. Ti hyb n'aa taw'ääts hē ta bag hadoo doo gó né hē bē babok. ⁹ Ta bag gó ji awäd bä, baad ji ky enyym, baad hadoo do P'op Hagä Do karēn do ji moo wät, dooh ji noo kanesa bä, dooh ji wad'ii bä. ¹⁰ Baad bē hyb n'aa newē, Tak'ēp Hyb N'aa Jawyk Do karēn do hä bē h'yy kadaw'uuh hyb n'aa. ¹¹ Bē moo boo manä badagyp do hadoo doo gó habok do ramoo heb'ooh doo. Dooh baad hadoo do ta ti hanaa. Bē maher'ood sa hä, bē metäh sa hä, baad nado rabahapäh hyb n'aa ta ti badagyp hadoo doo gó moo kahew'ēet doo. ¹² (Nu meby n'aa näng kejēn doo gó ramoo heb'ooh do ky n'aa ji her'ood bä.) ¹³⁻¹⁴ Ti hadoo né hē, sa hä ji maher'ood bä, ji metä

bä sa hä nyy da P'op Hagä Do karën ji hä, nesaa do né hē ti ramoo bok doo, rabahapäh da tii bä. Ta bag banäng bä ji manyyh do badagyp doo gó kejën do hadoo tii. Ta bag metëeh, ji bahapäh da ny hadoo ta tii. Ti hyb n'aa hahÿÿ da ta wób sa kyyh:

“Ty gawëej däg haÿÿh do òm.
Ganä da dejëp do mahang hawät do òm.
Tii bä Kristo bag adäng da a hä.”*

¹⁵ Ti hyb n'aa, taw'ääts hē baad bë hyb n'aa matakä nyy da bë babok. H'yy gatemah do rababok doo da bë aboo manäh. Taw'ääts hē P'op Hagä Do karën do hä h'yy genäh do rababok doo da bë babok. ¹⁶ Ta tyw n'aa nyy bä baad hadoo ji moo wät hyb n'aa, taw'ääts hē bë moo boo né hē baad hadoo doo, nesaa do jé pad'yyt hē takah'üüm kän do hyb n'aa da hē. ¹⁷ Ti hyb n'aa bë h'yy gatemala manäh. Taw'ääts hē bë h'yy kadaw'uuh Tak'ëp Hyb N'aa Jawyk Do karën do hä. ¹⁸ Bë eëg manä hejooñh do bë ba'oom hyb n'aa. Ji baoom do ji tah'yyb mahüüm nesa do ji her'oot, nesaa do ji moo wät hyb n'aa, ji tarejää na-ääj hē. Taw'ääts hē P'op Hagä Do Sahee tii, bë an'oo baad bë tah'yyb mahüüm hyb n'aa. ¹⁹ Tii bä, Saaw-Mo hä hanäng do kejäm do ky n'aa me, ta see pé P'op Hagä Do ji ma ejäm do ky n'aa me na-ääj hē bë maher'ood ta wób.† Tii bä, bë h'yyb gó naa Tak'ëp Hyb N'aa

* **5:13-14** Gadagyp do hadoo doo gó habok doo, haÿÿh do hadoo, dejëp do hadoo na-ääj hē P'op Hagä Do ranahapäh do hyb n'aa. Kristo ky n'aa ji gado bä ji ty gawëej däk do hadoo, ji ganä wät do hadoo. † **5:19** Ta wób ji h'yyb en'yym hyb n'aa tii, sahõñh hē ratsebé hyb n'aa na-ääj hē.

Jawyk Do bë j'aa etsë, bë ma ejäm. ²⁰ Tii bä, P'op Hagä Do Sahee bë tah'yyb mahũũm do hyb n'aa, taw'ãäts hë ër Wahë N'aa Jesus Kristo häd gó had'yyt hë bë h'yy gadeja P'op Hagä Do ër Yb wë. Taw'ãäts hë sahõnh hë hyb n'aa bë h'yy gadeja ta wë. ²¹ Kristo bë weh'ëeh do hyb n'aa taw'ãäts hë bë da hadoo do bë ky daheeh. Taw'ãäts hë kawanajãän doo gó bë gadoo bë ramaher'ood bä.

ÿÿj hã tamaher'oot do ky n'aa hahÿÿh

²² ÿÿj, taw'ãäts hë bë ky daheeh bë patug, Tak'ëp Hyb N'aa Jawyk Do bë ky daheeh doo da. ²³ Ta ÿÿm nu gabóg ta patug, Kristo, ta hã h'yy ka'eeh do sa nu gabóg hadoo doo da. Kristo hub hadoo do ta hã h'yy ka'eeh doo. Kristo sa h'yyb tym dëeb. ²⁴ Taw'ãäts hë Kristo hã h'yy ka'eeh do ta hã raky daheeh doo da sahõnh hã sa ÿÿm raky daheeh sa patug.

Ajyy hã tamaher'oot do ky n'aa hahÿÿh

²⁵ Ajyy, taw'ãäts hë bë kamahän bë äj, Kristo ta hã h'yy ka'eeh do takamahän doo da, ta daaj hë sa hyb n'aa takan'oo däk doo, ²⁶ tsyt hë ta wë tabasëew hõm hyb n'aa, baad sa hã tabenäm hyb n'aa. Ta ky n'aa hyb n'aa sa hã tabenäm. Naeng me tabenäm hadoo sa hã.† ²⁷ Tii d' tawén d'oo, tak'ëp hanäm gó takarën ta hã h'yy ka'eeh do rababoo däg kän, ta wë tagadoo noo gó. Takarën dooh hesus hedoo doo pé sa mahang hanäng. Takarën dooh baad nadoo do sa mahang hanäng péh. Tsytt hë nesaa do mahänh, baad had'op doo da rababoo däk takarën. ²⁸ Taw'ãäts hë ajyy rakamahän sa

† 5:26 Ji nu kemuun do ky n'aa tii.

äj, Jesus bad'oo doo da né hẽ ta hã h'yy ka'eeh do wẽ. Taw'ãäts hẽ sa hã hẽ rakamahãn doo da ajyy rakamahãn sa äj. Jé ta ÿÿm kamahãn doo, ta daaj hẽ ti takamahãn ta hã hẽ. ²⁹ Ta ti ÿ wén her'oot, dooh ta daaj hẽ, ta hub ty n'aa ges'yyk péh. Ji waa ji esoos ji bahejooñh hyb n'aa, baad ji hag'ãäs ji hub hã. Ti hadoo Kristo bad'oo ta hã h'yy ka'eeh do hã, baad ji tabahag'ãäs. ³⁰ Sét ken'yyh eër, ta hub uuh hadoo eër. ³¹ Hahÿÿ da takerii däk Genesis hã: “Ti hyb n'aa kä m' aj'yy kä sa yb sa ÿÿn mahãnh kä sa m'aa hẽnh kä, tagatëë hyb n'aa ta ÿÿm kä. Raketëë jawén paa bä sét rabahado padëëk ta ÿÿm daheeh”, § näng kerih doo. ³² Tak'ëp tabahetsooh ta ti kerih do ky n'aa see pooj jé ji nahapäh doo. Hã ÿÿ, Kristo, ta hã h'yy ka'eeh doo, séd h'yyb hedoo do ky n'aa ta ti taher'oot na-ãäj hẽ. ³³ Te hub né paawä ta tii, ketëë do sa ky n'aa na-ãäj hẽ taher'oot. Ti hyb n'aa sahõnh hẽ bë ajyy, taw'ãäts hẽ bë kamahãn bë äj bë hã hẽ bë kamahãn doo da. Taw'ãäts hẽ ÿÿj raweh'ëeh sa patug.

6

Karapee, pahëew, maruus, sa yb hã na-ãäj hẽ tamaher'oot do ky n'aa hahÿÿh

¹ Karapee, pahëew, maruus, Tak'ëp Hyb N'aa Jawyk Do karapee bë bahadoo do hyb n'aa, bë ky dahé bë yb, bë ÿÿn. Taw'ãäts hẽ né hẽ ta tii da bë bad'oo. ² Hahÿÿ da kerih do hã: “Mawehëë a yb, mawehëë a ÿÿn.” Jããm pooj jé P'op Hagä Do ky n'aa jaw'yyk do ji ky dahé bä baad hadoo do ji gadoo taky däng do tii. ³ Hahÿÿ da ji hã taky

§ 5:31 Genesis 2.4

däng: “Mawehëe bä a yb, mawehëe bä a ÿÿn òm wäd dawëet da badäk hahÿÿ bä.”*

⁴ Bëeh, sa yb, bë ejăg manä bë taah rah'yy ganapõ mahănh. Taw'ãäts hë baad bë baw'ëeh baad bë maher'ood sa hã, baad rababok hyb n'aa. Bë ma met'ëeg sa hã nyy da Tak'ëp Hyb N'aa Jawyk Do karën ji bawät.

Sa karom hã, sa kariw n'aa hã na-ãäj hë tama-her'oot do ky n'aa hahÿÿh

⁵ Bëeh, sa karom, bë ky dahé bë kariw n'aa. Baad bë wehëe sa hã. J'ooj madäk doo me bë moo boo manäh bë ramejũ doo. Kristo bë ky daheeh doo da bë ky dahé bë kariw n'aa. ⁶ Taw'ãäts hë dooh jããm hë bë ky daheeh bë moo bok do tahegãã bä, bë hã taj'aa etsë bë karën paawä do hyb n'aa. Kristo karom bë bahadoo do hyb n'aa, bë h'yyb gó naa, P'op Hagä Do karën doo da bë moo boo sahõnh hë. ⁷ T'õp bë h'yyb gó naa, tsebé doo me, bë moo boo bë ramejũ doo. Taw'ãäts hë Tak'ëp Hyb N'aa Jawyk Do wë bë moo bok ta ti bë h'yyb gó, ajyy wë had'yyt nado. ⁸ Hahÿ bë hyb n'aa newë: Sahõnh hã Tak'ëp Hyb N'aa Jawyk Do anoo da baad hadoo do ji moo wäd wät do mabaj, ta see karom ji do bä, sa karom ji nado bä na-ãäj hë.

⁹ Bëeh, sa kariw n'aa hedoo doo, bë karom bë raweh'ëeh doo da bë wehëe na-ãäj hë sa hã. Bë eãm manä bë karom, sét né hë ji Kariw N'aa hÿ pong jé hawät do bë bahapäh do hyb n'aa. Bë karom sa Kariw N'aa, bë kariw n'aa na-ãäj hë né tii. Ta ti dooh tasëew bä ji mahang. Séd gó tagadoo sahõnh hë. Ti hyb n'aa tabad'oo doo da bë bad'oo.

* **6:3** Dew-Teronom 5.16

Ji mo n'aa jesuu n'aa ky n'aa hahỹỹh

¹⁰ Tagadëeg ub bë ÿ maher'oot hahỹỹh: Bë h'yy kahejój Tak'ëp Hyb N'aa Jawyk Do hanaa, tak'ëp hadoo do ta hejój hanaa. ¹¹ Kaneb'ooh do pooj jé sahõnh hẽ ta mo n'aa jesuu n'aa warahén dadäk doo da, ta kuman tado däk doo da, bë dadäg hadoo bë mo n'aa jesuu n'aa, bë ado däg bë kuman hadoo do bë hã P'op Hagä Do an'oo däk doo, Dijab karën bä bë tawadii, bë hã tanahajaa hyb n'aa, ta hã bë j'aa ketsë hyb n'aa. ¹² Ta ti ÿ wén her'oot, dooh ajyy ër majĩ rado bä. Karap'aar h'yyb nesaa do hedoo do hyb n'aa jewyk doo, nesaa do hejój n'aa näng doo, badäk hahỹỹ bä badagyp do hadoo doo gó habok do hã bag'ããs doo, ti né hẽ ër majĩ. Kabaj'aa hedoo do nesaa do wë hã habong doo, ti né hẽ na-ãäj hẽ ër majĩ. ¹³ Ti hyb n'aa, bë ado däg sahõnh hẽ bë mo n'aa jesuu n'aa, bë kuman hadoo do na-ãäj hẽ P'op Hagä Do anoo doo, nesaa do bë wë takajaa noo gó nesaa do bë hã tanahajaa hyb n'aa, sahõnh hẽ bë bahajaa bä kä, bë j'aa ketsë hyb n'aa kä. ¹⁴ Baad bë hyb n'aa matakä däg. Bë ehub had'yyt hẽ bë her'oot do hã, ër majĩ wë bë bahej'oonh hyb n'aa. Warahén ta baa wyd tadadäk doo da tii, tanahewaat hyb n'aa. Warahén ta h'yyb gatsapoog n'aa tadadäk doo da baad takan'yyh hyb n'aa, baad had'op bë aboo baad bë kan'yyh hyb n'aa. ¹⁵ Warahén ta tsyym suun tapadedëek doo da takahej'oonh hyb n'aa, tii da baad bë gado panyyg hanäm doo, h'yyb nyyw gó ji bawät hanoo doo, nesaa do hã bë h'yy kahej'oonh hyb n'aa. ¹⁶ Warahén gatoj jesuu n'aa hadoo ji h'yy ka'eeh doo. Bë h'yy kae né hẽ. Bë h'yy kae bä bë hajaa

bë meduuk gatoj hadoo do hahõng do Nesaa Do Yb hanaa. Bë h'yy kae bä, bë hajaa bë medug bä Nesaa Do Yb bë tah'yyb tatuk doo. ¹⁷ Warahén ta soog sapaar s'ëëb tadadäk doo da, baad bë hyb n'aa newë had'yyt hë bë Jesus edëëb wät né hë nesaa do mahãnh. Bë ado däg na-ããj hë P'op Hagä Do Sahee anoo do sën-jeer, P'op Hagä Do kyyh. ¹⁸ Bë er'ood had'yyt hë P'op Hagä Do sii, bë hä ta Sahee h'yyb mahũüm doo da. Bë ky n'aa ets'ëë bë tamasaa had'yyt hë hyb n'aa. Bë hyb n'aa matakä had'yyt hë. Bë h'yy gejë hõm manäh. Bë ky n'aa ets'ëë had'yyt hë ta wób Jesus hä h'yy ka'eeh doo.

¹⁹ Taw'ããts hë hëp ÿ n'aa na-ããj hë bë ky n'aa etsëë, ÿ ber'oot bä, P'op Hagä Do anoo hyb n'aa hä ÿÿ ÿ her'oot do pan'aa, h'yyb neÿÿm doo me ta ky n'aa hanäm do pooj jé ji nahapäh do ta wób hä ÿ maher'oot hyb n'aa. ²⁰ Ta ti ky n'aa hanäm do rod n'aa ÿÿh, Jesus mejũũ doo, ÿ rawén dawäts geët. Hëp ÿ n'aa bë ky n'aa ets'ëë, ta ky n'aa hanäm do h'yyb neÿÿm doo me ÿ baher'oot hyb n'aa, hä ÿ Jesus karën doo da.

Paw-Ro kedëë hõm do ky n'aa hahÿÿh

²¹ Tikiko, ër hÿÿj hadoo do baad ër kamahãn doo, baad ãã sii Tak'ëp Hyb N'aa Jawyk Do wë moo wät doo, bë da tamaher'oot sahõnh hë këh ÿ n'aa.

²² Bë wë ÿ mejũũ tabahõm bë tamaher'oot hyb n'aa nyy da babä ãã babok, bë tah'yyb en'yym hyb n'aa na-ããj hë.

²³ ãã karën h'yyb näw, kamahãn doo, baad h'yy ka'eeh do na-ããj hë P'op Hagä Do ër Yb, Jesus Kristo Tak'ëp Hyb N'aa Jawyk Do ranoo bë hä hãj haa hedoo doo. ²⁴ ãã karën sahõnh hë ër Wahë

N'aa Jesus Kristo hã had'yyt kamahãn do wë P'op
Hagã Do ky enyym. Jããm hẽ kä.

Pop Hagä Do Panyyg Hanäm Do Hahÿÿh
The New Testament in the Nadëb language of Brazil
(BR:mbj:Nadëb)

O Novo Testamento na língua Nadëb do Brasil

copyright © 2011 Wycliffe Bible Translators, Inc.

Language: Nadëb (Nadëb)

Translation by: Wycliffe Bible Translators

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nadëb

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-29

PDF generated using Haiola and XeLaTeX on 21 Feb 2024 from source files
dated 31 Aug 2023
c5681c4e-55f8-5b64-badf-af07c5e28afc